

正定縣志卷四

古蹟

東垣始於趙國正定創於漢朝厥後爲郡爲州爲府
縣城從未遷徙況地當衝要教蔚人文過客之登臨
學士之考核篇章題詠勝迹尤易流傳較遠徼荒陬
易資考鏡謹卽舊志詳加釐訂著於篇

東垣故城 在縣南八里今名古城史記趙武靈王二
十一年攻中山取東垣又蘇秦說燕曰趙之攻燕也
不十日而數十萬之軍軍於東垣矣正義東垣趙之
東邑在正定縣南八里漢書高帝紀十一年陳豨將

正定縣志

卷四

古蹟

一

趙利守東垣高祖攻之不下卒罵王怒城降卒罵者
斬之地理志正定縣故東垣高帝十一年更名一統
志東垣城秦漢以來縣皆治此晉初移今治

常山故城 在正定縣東南本漢九門縣地晉永和中
慕容雋攻冉閔築壘於此曰安樂壘後魏道武登常
山郡城北望安樂嘉其美名遂移郡焉北齊復移郡
治正定隋開皇十六年分正定置常山縣即故安樂
壘也大業初復省入正定一統舊志常山故城在縣
東南十八里

故權城 元和志在正定縣北二十里即古之犍鄉也

後漢建武元年賈復破青犢於射犬追戰於正定之
犍鄉大破之卽此地又通典鎮州城東有恒陽城開
元中常置恒陽軍於此今村仍名權城

潭城 在正定縣卽鎮州牙城歐陽修曰常山宮後有
池亦曰北潭州之勝遊惟此故牙城亦謂之潭園

新市故城 在縣東北四十里本古鮮虞國後爲中山
國左傳昭公十二年晉荀吳假道於鮮虞滅肥杜預
注鮮虞白狄種在中山新市縣又定公四年荀寅言
於范獻子曰中山不服哀公三年齊衛圍戚求援於
中山杜預注中山鮮虞也漢景帝二年封王噐之爲

正定縣志

卷四

古蹟

一一

侯邑屬中山國晉隆安初魏主珪圍後燕中山城慕
容麟以城中饑困帥衆出據新市隋大業初省入九
門唐武德初復置五年廢爲新市鎮元和四年王承
宗拒命詔諸道討之白居易言河東易定兵討鎮冀
竟不能過新市鎮也宋亦爲新市鎮舊屬新樂今屬
正定名新城舖亦名府城驛府城之驛在此故也

龍騰苑 十六國春秋慕容熙八年大築龍騰苑廣袤
十數里役徒二萬人起景雲山於苑內基廣五百步
峰高十七丈今隆興寺卽其遺址也故賜額曰龍騰

初地

神女樓 在城北元志舊有臺俗呼神女樓王士正有
邯鄲賔客皆能賦誰似朝雲楚大夫之句

舒嘯臺 在縣南古城東元蘇天爵先世隱居處至正
中天爵因高爲臺構屋其上匾曰舒嘯朱澤民爲記
今廢

麥飯亭 在縣南滹沱河上因馮異進光武麥飯後人
建亭今廢

春風亭 在縣北安豐里元蘇天爵任侍郎時構爲別
墅虞集顏其額陳旅爲記

步樂亭 在縣治北元承相史天澤建

正定縣志

卷四

古蹟

三

旺泉亭 在城北舊有旺泉乾隆十年水利案內疏濬
因之積土成臺建亭其上曰導醴臺高二丈許廣有
加亭稱之亭周以泉泉內外雜植桃柳花時春水澄
碧競綠爭紅亦勝地也乾隆十五年九月 駕幸其
地督臣方觀承有詩記之道光七年六月十三日大
風雨亭圯花木亦無存矣

蕭閒堂 不詳所在金蔡松年別業常山貞石志萬歲
禪院四至莊產內有南至蔡相公墻基攷金史蔡松
年傳天會中松年除正定判官遂爲正定人官至尚
書右承相所云蔡相公當是松年中州集小傳云松

年鎮陽別業蕭閒堂自號蕭閒老人府縣志不詳所
在據石幢所載四至及今寺址考之松年故宅當在
舍利寺之南府治之西按舍利金爲十方定林院元
爲萬壽禪院明爲舍利寺

喜兩堂 在縣治內今廢釵納錫璋爲記

藏書堂 在城內元蘇天爵建今廢袁楠爲銘

省心齋 在城內元吳當爲記今廢

滋溪書屋 在滋河北新城舖元蘇天爵讀書之所宋
本爲記

雕橋莊 在縣西十五里明吏部尚書梁夢龍莊也趙

正定縣志

卷四

古蹟

四

南星爲

醴泉古驛 在縣南通鑑唐天寶十四載常山太守顏
杲卿襲執安祿山將何千年於醴泉驛胡三省注驛
在常山界南直趙郡

風動碑 在府治南察院內唐代宗永泰二年爲成德
軍節度使清河郡王李寶臣載紀功德王士則書王
世貞集寶臣降虜與田承嗣輩創藩鎮之禍其人本
不足道碑辭脅下爲諛餒謏不文王士則者僅見陶
九成書譜中不甚著而書法遒勁瀟灑有李北海張
從申之筆良可寶也碑在正定御史行臺不易搨昨

夏周中丞如 一本裝潢成帙而記於後

海子園 在城外亦名潭園通鑑唐景福三年王鎔館李匡威於梅子園卽此一統志作海子園金史海陵紀正隆元年詔取正定潭園樹木營建宮室園之廢久矣今東城外有地名海子岸或其遺址乎

宋行宮 太祖太宗曾幸鎮州故有行宮宋史五行志太平興國五年行宮殿 生芝如荷花知府趙賢進以圖來上卽此一云卽潭園駐蹕於此改爲行宮理或然也

玉華宮 元世祖中統二年遣鍊師王道歸正定築道

正定縣志

卷四

古蹟

五

觀賜名玉華仁宗皇慶元年遣司徒田忠良等詣正定玉華宮祀睿宗御容泰定帝泰定三年詔葺玉華宮按正定始爲太宗太后湯沐邑事在太宗八年丙申見太宗紀而食貨志載睿宗子阿里不哥位丙申年分撥正定路八萬戶與記所稱憲宗分封諸弟年分不合以理揆之其地始爲太后湯沐後爲睿宗所有睿宗崩以授阿里八哥憲宗分封諸弟亦遂仍其舊正定爲睿宗分地故建宮祀之

望臺 在城內趙武靈王所築以登望趙境亦曰塞臺見太平御覽

韓信洞 在永安門外舊北門址之右相傳韓信襲趙
爲隧道以渡軍潛通獲鹿縣韓信廟之後今堙塞惟
洞口磚甃數步可人

華塔 在南門內迤東廣惠寺內琢石爲虎豹獅象之
形飾以五彩勢凌霄漢碑稱隋唐舊製至今重修蓋
數千年多寶塔也

陽和樓 在南大街元至正十七年修元楊俊民爲記
洪武中知府郭勉置更漏其上宏治十七年重修大
學士石珪爲記

中渡橋 宋景德元年春二月知鎮州馬知節成中渡

正定縣志

卷四

古蹟

六

橋車駕在澶淵王超以中渡阻水不急進兵知節爲
治橋一夕具一統志舊在縣南五里胡三省曰此爲
中渡明上下流各有渡也

平都督將臺 在縣西北二十里舖明建文中平安曾
屯正定以禦燕師

雅鑿亭 在南門外察院廳後春秋堤柳池蓮交映襟
帶之下堪供眺覽嘉靖二十五年巡撫蘇佑御史傅
鎮建鎮自爲記今廢

望河亭 乾隆十一年春三月城南建望河亭防守滹
沱今廢

狀元樓 在縣學康熙中教諭陳鶴齡之子惠華隨任
讀書雍正甲辰狀元及第於讀書處建樓記之今廢

玉華宮罷遣大常禮樂議

元方永貞

竊聞天子七廟萬世之通義三代以還莫違茲道原廟之制隆古未聞漢孝惠從叔孫通之請始詔有司立原廟至元帝永平四年貢禹奏郡國祖宗廟不應古禮宜正定天子是其議罷之謹按尚書黷於祭祀時爲弗欽春秋之義父不祭於支庶君不祭於臣僕之家伏觀聖朝建立七廟宗奉孝享可謂至矣而睿宗皇神御別在正定路玉華宮竊惟有功德於天下者莫如太祖皇帝世祖皇帝太祖皇帝不聞有原廟世祖皇帝神御奉安大聖壽萬安寺歲時差官以家人禮祭供不用太常禮樂今玉華宮原廟列在郡國又非龍興降誕之地主者以臣僕之賤供奉御容非禮之甚伏望朝廷稽前漢故事致隆太廟玉華宮照依京師諸寺影堂例止命有司以時祭供罷遣太常禮樂非獨聖朝得典禮之正而在天之靈無褻瀆之煩而禮官免失禮之責矣

舒嘯臺記

朱澤民

樂以天下憂以天下至公之心也故君子居廟堂之時思堯舜其君而皞皞其民者或未達甯無耿耿於其中者乎處山林之時思堯舜其君而皞皞其民者

或未達則亦甯無耿耿於中者乎參知政事蘇君伯修居正定古城之東先世隱居讀書之地也至正六年秋公以奉使事畢歸其鄉嘗憑高覽遠若有感於懷者於是因高爲臺結構屋其上自取晉處士陶元亮歸去來辭中語扁名曰舒嘯焉或曰舒嘯者宣其悒鬱之氣也公事於朝登館閣

宣撫矣事郡縣行省可謂榮且顯矣其何以舒其悒鬱者哉未知公者歟夫以儒者學業措之政事其立朝也垂紳正笏嘉謀讜論而思所以致君澤民者有其道矣時或不得盡行其志則耿耿於中者

正定縣志

卷四

古蹟

九

甯不思登臺而舒嘯乎其在外也建節行部宣化鎮俗而思所以致君澤民者時或不得盡行其志則其耿耿於中者甯不思登臺而舒嘯乎然則臺之築公之意也公之居古趙地也南望則滹沱之河滋水東注西望則廉頗李牧之故墟也山川如昔而草木榮悴於春秋曾不知其幾也而名迹之相傳或有不滿於當時者今公之登斯臺也以忠君愛物之心不忘於一舒一嘯之項尙將拔賢才而列於國求善治而施於民樹名節於來今垂聲光於不朽則斯臺之名與實也將於宇宙相傳於無窮矣豈特廉李公云哉

公之心蓋曰憂天下之憂者將以爲己任樂天下之樂以吾君吾民之樂爲樂而不自以爲樂焉此臺之所由築而舒嘯之所以名歟因書以爲記

滋溪書堂記

宋本

延佑六年予初來京師聞國學貴游稱諸生蘇伯修以碣石賦中公試釋褐授薊州判官徃徃誦其警句名籍甚欲一識則己赴上及還始與交因得知伯修多藏書習知遼與金故實暨國朝上公碩人家閥閱譜系事業碑刻文章既久又見其嗜學不厭嘗疑胄子有佻達城闕者己仕卽棄故習伯修獨爾其淵源

正定縣志

卷四

古蹟

十

必有出師友外者詢之則果自其先世曾大父少長兵間郡邑無知爲學者己能教子爲文先其大父威如先生教其考郎中府君尤嚴或曰君纔一子盍少寬輒正色曰可以一子故廢教耶先生學廣博嘗因金大明厯積算爲書數十篇厯家善之府君旣爲時循吏又好讀書教伯修如父教己有餘俸輒買書遺之於是予疑益信又久之則其所著書曰遼金紀年曰國朝名臣事畧者皆脫藁而今之諸人文章方類萃未已士大夫莫不歎其勤伯修汲汲然至不知饑渴之切己也且謂予昔吾高王父玉城翁當國初自

汴還正定買別墅縣之新市作屋三楹置書數十卷再傳而吾王父威如先生又手自鈔校得數百卷貯之因名屋曰滋溪書堂蓋滋水道其南也歲久堂壞先人葺之而不敢增損且漸市書益之又嘗因公事至江之南獲萬餘卷以歸吾懼族中來者不知堂若書之始幸文之將刻石嵌壁以示嗚呼有子不知教不論教而不克如志者如志而不得及於子者皆是也求若蘇氏四世知爲學躋哉世之致爵祿金玉良田美地者其傳期與天地相終始然有身得身失者况其後乎萬有一能振奮過祖禰者則又鄙昔之人

無聞知撤敝廬創甲第矜富貴病先世之微不肯道而翁之堂府君能葺之伯修能求記之翁之書先生能加多府君又益增之伯修之購求方始不第能守也非有以將之能若是乎府君葺堂不敢有加以求勝前人伯修有屋京師正定皆不敢求記獨惓惓是區區之三楹者又可以爲薄俗警矣抑蘇氏雖世爲學獨威如先生至伯修三世皆一子惟其能教故悉克自樹立今伯修亦一子阿瑣甫韶而穎拔可就傅伯修能繩先生義方以造之則堂暨書之傳邈乎未可槩也是爲記伯修名天爵今以翰林修撰拜南行

臺監察御史云至順二年十二月二十六日大都宋
本紀

蘇伯修藏書室銘

袁 桷

銘曰六學鴻烈代天昭明精思纂微辭以立誠匪事
於言不文奚宣析理日繁宜致衍傳默定以通紀其
知聞敬焉孰持道焉孰盲趙郡氏蘇崇其書楹剖決
雲章經緯有程靈根湛虛服習粹精廣以觀萬約以
守一迎之莫尋倚兮不躡仰止元聖學海彌溢

春風亭記

陳 旅

禮部侍郎蘇公伯修有別墅在正定城北之安豐里

正定縣志

卷四

古蹟

十一

洽其地爲園植桃杏數千本而築亭其上意倦游來
歸則與里之賢者於焉夷猶覽春物以舒情也名之
曰春風亭使旅爲之記嘗聞古之君子知萬物皆備
於我欲以其身甄陶乎天地之和而睟面盎背足以
使人歆動嚮慕而善心興焉昔曾皙言志有莫春風
浴之對孔子與之程子謂其言有堯舜氣象旅嘗因
其言思之於變時雍與綏來動和同一機也體信以
達順窮神以知化鼓萬物而不知所以然也近世伊
洛君子其亦有志於此者乎邵子之學不見於施用
佳時出游士大夫欣然耳其車音雖童見僕隸亦莫

不喜其至使以其學施用於世又何如耶程伯子所至而民化既去而人思之以忠誠孚於人主而始終不疑極言新法之非便而爭者不怒朱公揆以春風言之可謂善言德行矣方宋盛時而二子居天下風土之中游從往來託風雲卉木以吟咏其所適何其藹然風浴之跡乎伯修清明而溫厚又善學以成其德人與之處不知和氣之薰蒸也他日言歸故鄉燕休斯亭以同歌堯舜之治不亦盛歟

修陽和樓記

楊俊民

陽和樓者鎮府巨觀也橫跨子午之達曼闔閱闡之

正定縣志

卷四

古蹟

十三

表每登於斯南瞰滹水北瞻恒岳右挹太行之晴嵐左觀滄海之旭日飄然若出塵世御天風於九霄之上自譙樓廢宵漏移置夜靜聞鼓角之聲全城響應昔人所謂聽更鼓分明而知尹之賢者在是矣至正十七年春監郡普顏公大尹趙公慮其圯敝將興是役而不忍重煩吾民集大刹僧諭之曰科徵稠疊杼軸已空爾等深居無擾國恩至矣今公家有必興役可無施乎且慈憫羣生佛氏之教也僧衆忻然願獻資糧若干迺選廉能者董之厚直以募工平債以市物摧壓者正之朽腐者易之闕壞者補之聳鳴吻於

兩端環粉堞於四門鞏以瓴甌表以黝堊飾以丹碧
物精工善肇事於三月畢工於六月過者駭心驚目
於戲斯一役也而有可書五世傳此門爲子城南門
三面無跡巋然獨存修完古蹟以壯雄郡一可書也
震風凌雨帡幪有庇俾更卒安居司漏候天節人二
可書也督役則擇郡人仕而代閒者不用公吏以絕
姦弊三可書也費出於諸寺夫取於門卒秋毫不犯
乎民四可書也一言僧悟忘貪向義克濟盛美五可
書也有五可書而書之不但記歲月而已

重修樓記

和陽

石瑤

正定縣志

卷四

古蹟

十四

正定爲京師輔郡當南北襟喉之衝諸方文軌道必
由郡而入我國家重熙累洽化導百餘年禮樂名物
大復先王之舊非復元季喪亂之日故雖池臺樓榭
苟可爲民表者亦皆巍然煥然若今陽和樓是也陽
和舊傳爲郡子城南門以今揆之適當城之中負坎
嚮離地局平正市廛井陌環列四周上置五更漏刻
有星人司焉以候晨夜蓋古者登靈臺望雲物占象
考瑞以授人時其制度之大焉而不可闕者也今大
守南昌熊公下車之明年興滯補敝百務薦舉迺暇
日登斯樓而望之東瞻青徐西瞰關塞而其南則見

滹沱迅流帶以清漳千里達于大河韓來魏趨秦驅
蜀走復有重譯而至者西南之夷卓乎偉哉此非一
郡之勝圖實四方之奇觀也於是慨然有風雨鳥鼠
之憂焉迺徧召郡民之有秩者播告於庭諭以大義
俾葺而新之令既下諸執事奉以奔走貲者貲粟者
粟舁石於山升木於淵羣工庶黎各獻其力蓋經始
於宏治己未之三月不十旬而功告成矣君子曰何
其不煩哉使之以其道故也嗚呼天下之事固莫不
有興有廢然其興也亦未始不由豪傑廉靜之士以
道使之故岳之岳陽得宗諒而益彰黃之竹樓至今

正定縣志

卷四

古蹟

十五

誦元之者未已苟非其人焉則功立而讜興事成而
名隳雖十倍茲樓猶將無取也哉猶將無取也哉

重修陽和樓記

梁清寬

郡之有陽和樓郡志不載所自始元至正十七年有
學士楊俊民記明宏治十一年有大學士石瑄記俱
重修事也而建樓之意終泯焉未彰嗣屢圯屢緝亦
代不乏人而補綴支柱厥工爲易因並記而無之中
州晉陽侯公當明壬午歲守吾郡大加塗槩顏額飾
楹赫然增壯可比宗諒元之之蹟然以侯公一世之
文雄曾不紀其歲月誠爲缺事迄今二十餘年椽拱

弛腐丹雘剝暗加以霖雨之後五楹俱傾若有待而興也邑侯王公庇吾邑有日矣閱之慨然曰此一郡之鎮也厥工焉可緩且管庫有修堤餘資若干繕正宜爲恒民成此大觀立請監司守佐諸公咸有同心爰命匠庀材刻期鳩力自上暨趾咸締構堅緻且彤髹駁蔚一還高明宏敞之舊而密麗過之卽所需丹碧木石不必鑿山溯川煩民勞遠一一取辦有法是不三月而轟然者岳峙翼然者翬飛郡人士咸重此舉之義而有成敏而不擾也請余爲記因念樓基莊嚴楹宇炳燹其途復值子午之衝創始者之意匪直

正定縣志

卷四

古蹟

十六

爲眺覽登賦已也按恒山上應昴十一度於辰爲酉於律爲南呂陰呂始於氈賔終於應鍾而酉屬南呂應陰數之四故陽以濟陰題額之義實準諸此再考地理行龍起郡之乾入城歧爲兩幹其北從府治而出震其南從縣治而出巽去之如駛恐無紆迴繞聚之致爲形家所忌故震有天甯諸浮圖以砥之而東南一塔偏右左隅惟斯樓巍然中竦俾乾元剛粹之氣常有縈迴憑依而不遠馳正應坤卦承天厚載之道也且南爲午火屬陽北爲子水亦屬陽而樓之下爲二道屬陰夫陽奇也二偶也以一偶居兩奇之中

取象於離所以數百年來人文蔚起多列第於樓之
南北而近所關之巨不誠然哉倘久而任其風雨爲
害崇墉就圯守斯土謂何今復見簷桷彫煥爲孔道
俱瞻俾往來其間者愾然興起則不能不追思創始
者之大有造於吾郡也則益不能不援振廢補陋者之
功大有類於創建也余樂觀其盛因爲記之如右

重修陽和樓碑

正郡爲畿輔重地西倚太行東接渤海南臨滹水北
拱神京誠河北之雄鎮也而陽和一樓地處高坦係
恒陽之文峯規模宏敞尤闔郡之巨觀自創始以來

正定縣志

卷四

古蹟

十七

人文蔚起科第聯發迄今歷有年所漸致頽廢我總
鎮徐公華旌甫至登樓四望慨然有重修之志因商
之郡守陳公邑侯徐公捐俸委員以董其事鳩工庀
材以要其成閱兩月而煥然維新若有神助者我正
郡何幸而遇諸公諸公又何造福於正郡若是之經
營備至體恤無己耶郡之人方將永戴洪仁時親德
教適總鎮徐公恭膺 簡命巡視邊郵此正不可
以不誌也公諱成貞號禹峯爲鄂城望族總鎮恒陽負
嶽降之姿專千城之寄天子倚爲股肱海宇恃爲保
障竝見甯謐封疆功標銅柱霖雨天下又不止於畿

南四府已也豈僅登陽和一樓思慕我公於不置乎
維時郡守陳公邑侯徐公皆曰是不可以不記

陳公諱浩號集生貴州普安州人徐公諱崇熙號介

夫浙江衢州府西安人

重修陽和樓碑

李雲章

古郡邑之制有臺焉書雲物占歲豐則登而望之有
麗譙焉察氓俗警寇盜則俯而臨之後代因之中衢
正屋昏旦鐘鼓非特以文形勢之雄勝而形勢卽於
是乎在正定府陽和樓其尤雄勝者也斯郡也扶衛
京畿郵達乎豫荆雍梁賔旅往來莫不貫城而驅駢

正定縣志

卷四

古蹟

十八

跡樓下是故闢雙門以分軌構層軒而表望潁南歧
北巍如洞如顧歷年多頽墜日劇行子避土木之險
居人咎風水之敝我太守關公于是召士民而謀之
且曰人有室廬內拊外闔入其門而瓦礫塞途何以
能家矧茲樓踞一城之正中竦萬衆之瞻視墮而復
興豈不在我適郡人前進士汾陽令王君世耀奉諱
歸有同志焉太守暨總鎮榮公率屬邑官割俸以餼
工王君倡郡中荐紳魁杰輸資以構材綜出納立程
課則推善信之士貢生馬廷臣庠生翟清助張友敏
田錫朱峴五君考其成揆日於辛卯之冬告功於壬

辰之夏太守諏吉夙駕親來落成峻標廓基不侈於
舊丹碧焜耀忽如飛來前倚神祠以爲固左緣磴道
而上升樓中袤延可布十席憑檻送目可撫四塔南
嚮重闈曼見郊野晴帶蜿蜒光動於睥睨間者虜池
也西則大茂諸山跳岑濤湧與天無際膚寸旁沛之
澤醞乎其中其東北平原逶迤一碧千里古豪傑之
所馳驟殘塹廢營猶若可辨至如花之春月之秋麗
矚萬態畢獻於几案於戲可不謂雄且勝哉然非太
守莅郡三年慈愛惠利使民遷善而民信從前葺節
孝祠表彰貞媛百餘人村娃田媪言之感泣今修是

正定縣志

卷四

古蹟

十九

樓非必取孤虛之說而屬望多士意則甚殷諸君子
不憚勞不惜費赴之若渴底於成功洵能服太守之
教造鄉鄙之福者充斯類也上仁下義亦何事之不
可成樓其小焉者矣李生久居是邦幸夫年豐俗醇
而游觀之得其所也爰綴文於珉用紀歲月竝系以
讚曰昂畢天街常山古城四庸雉堞百尺雕甍地胛
如龍樓爲之冠晴懸曜兩首昂天半闢門如肢樓爲
之心營衛流通氣沴不侵維福象陽維和致祥孰錫
嘉名郡民用康槃槃太守猗斐德懋起廢振新視茲
瓌構衆舉都士曰先日勞從善有基誕登于高烟霄

沏寥顥氣棲泊舒嘯流觀昇平偕樂於以落之三壽
作朋何以頌之如嶽之恒

雅鑒亭記

傅鎮

正定當畿甸通衢郵亭舊在郡治內星軺逕至闐闐
弗以時扃諸點伺爨每苦踈虞二十五年春余適厯
茲土與大中丞澤蘇公檄府議狀爰採輿情卜郡
闡之南規制供具視內加整於是賓至如歸譏察稱
便其明年通判劉君朝麒推官李當卽舍北構亭八
楹廊岩宏敞俯瞰蒼波如鏡湖然一日政暇公偕予
登而樂之予曰高人取適於閒上士雅觸於達觀

正定縣志

卷四

古蹟

二十一

則今也大觀備矣美莫美於斯矣不有正名曷示來
者公曰俞夫鑒萬物者莫辨於水然風塵鞅掌清濁
混淆纓足之介君子嚴焉鑒以雅名茲亭之所以特
盛與夫活源瀟湧縵迴縈紆習坎乘流不息晝夜雅
趣油然可以觀敦化矣虹消雨歇波瀾不驚耀金沈
璧上下昭迴雅懷湛然可以喻靜虛矣潢汙不注方
停泓影涵高秋長天一碧雅興浩然有振衣濯流
之想涼颼蕩漾浪縠披文淪漣蜿蜒自爾成章雅思
渙然有經文緯武之略若夫芰藻蒼葭毓秀凝芳錦
鬢皜翮依泳於中君子鑒之則思包荒之雅量霖霖

霑霈新濼浩渺萬流滙瀦郊壩渥濡君子鑒之則思
膏澤之雅施時既西夕元氣始凝皚雪英飄堅冰玉
積君子鑒之以類其潔象其止防其微登茲亭也非
徒酌逸志騁騷宕得於心達於政上以潤色皇猷下
以濟羣生近以取諸身鑒斯昭矣矧輔服首化之地
區而吾曹均有激揚之責外周皇華之務內嚴帷幄
之籌茲亭雅譽其庶幾乎日有聞也予曰嗟有是乎
鑒之時義大矣哉夫方塘詠心止水喻意殷鑒不遠
古今同流彼蘭亭清流不得專美於前矣是時公適
有巡西之行顧謂予曰宜有紀也既而吾西李公舊

正定縣志

卷四

古蹟

二十一

川劉君各以 肅於茲亭志雅合也既大書於堂
復命 州知州余一鵬筆於階前之碣俾往來諸君
子共鑒觀焉

藏書樓記

呂有志

古之建樓者過時頽廢惟梁昭明太子文選樓獨傳
千古焉叶棠容公與^志 爲忘形交每造其室見其器
不雕鏤服無纖麗老屋數椽足蔽風雨而已^志 酒然
異之謂公殆儉樸養德者歟庚申之春忽起樓焉^志
聞而訝之及觀顏其額曰藏書公之意可知矣世之
修樓者大抵欲覽山川之體勢窮島嶼之縈迴登高

望遠可以展胸襟而闊眼界其幻妄者謂仙好樓居
每一登臨青鳥赤松彷彿乎遇之至畫棟雕梁高出
雲漢徒誇藻麗者吾不知其人爲何如也公之建此
樓也不以藏貨財而以藏書志因之有感矣富厚之
家儲積百貨寒暖燥濕惟恐朽蠹至於斷簡殘篇有
任其侵蝕剝落塵土雜穢而度之無所者矣公獨起
樓以藏之豈僅耀牙籤滿架哉古聖先賢森列盈室
焚香靜對陶我性情消我鄙吝是與古人會合斯樓
也不獨是也披其卷而天地之菁英中華之圖籍異
域之風俗目所不經見者一覽卷而得之卽謂藏書

正定縣志

卷四

古蹟

二十一

而奇珍異寶其價莫名無不包羅可也公性好讀書
由此日登斯樓沉浸穠郁含英咀華將見胸羅星斗
詞吐珠璣中懷之所藏食而能化豈徒束書高閣充
乎棟宇而止哉後之子孫覩公之樓繼公之志檢校
之際太乙藜杖吹火照青從此玉樹芝蘭盡修五鳳
樓手段可預卜也豈徒號爲文選已哉志因落成而
爲之記他日造訪倘許窺其秘書是瑯環福地身得
親遊矣

韓信洞辨

趙文濂

凡城皆有突門亦曰闔門闔城時通偵探出奇兵之

路也正定城基乃唐節度使李寶臣所擴明知縣顧
綬周應中始甃以磚則所謂洞者卽突門也而以爲
韓信則附會之說耳縣舊名東垣初屬鮮虞後屬趙
秦因之漢高帝十一年改曰正定因舊治卽今之古
城村武帝元鼎時置正定國始治此安得謂洞與獲
鹿韓信廟相通乎考韓信伐趙出井陘口今獲鹿之
土門斬陳餘於泚水在元氏擒趙歇於鄗卽趙州其
時趙都襄國今順德府兵敗南奔漢乘勝追而滅之
兵未至東垣亦未至滹沱河北也韓信廟在土門距
正定七十里中隔重山大河何能宛轉相通乎以時

正定縣志

卷四

古蹟

二十二

與地考之說之無稽不可爲典要矣各志於古迹多
附會其說韓信洞其一也

古迹

神女樓

勞勲成

縹緲難尋古畫樓照眉池涸半潭秋漢臯佩冷江妃
遠巫峽雲深楚客愁夢境已隨仙境杳琴聲猶帶水
聲流吳娃主父無窮恨竟日靈風捲不休

麥飯亭

沈浩

禾黍西風野飯香一亭危渡幾斜陽已知天意扶炎
漢不信窮途有帝王白水真人何倉卒赤眉銅馬太

披猖絕勝亡國留餘恨澆到荒墳說後唐

滹沱麥飯行

張雲錦

君不見滹沱冰結天狂風王孫脫險趨南宮兵馬甫
離饑寒迫燎衣對竈前途窮巡行河北事未就區區
王郎能興戎不虞伏莽猝見迫白龍魚服憂危同流
漸徑度仗河伯壺漿急餉無漁翁大樹將軍竭忠悃
手進麥飯倉皇中更有蕪蕪亭下粥饑渴聊解非邀
功從此收兵靖擾攘燕趙幽薊妖氛空反側全銷赤
眉賊規模遠繼隆準公間關避難事常有明皇蜀道
奔蠶叢中途亦曾啜疏糲荒淫覆國憂忡忡何如赤

正定縣志

卷四

古迹

二十四

手興炎漢出奇制勝偏師攻倉卒一孟田家飯興亡
治亂分污隆滹沱此日烽烟靖布帆無恙溪流通肥
子城邊芳草綠蕭王渡口斜陽紅戰爭餘風弔過客
黍肉饁餉來村童古迹茫茫何處覓亭前麥穗抽芄
芄

麥飯亭

容丕華

風雪馳驅喚奈何壺殮從徑過滹沱烏亭鷺堠炊烟
少岸芷汀蘭舊迹多滹口亭空基尚峙原頭麥秀浪
仍挖燎衣對竈尋遺事剩有寒流起白波

觀王士則書李寶臣紀功碑

趙文濂

皇華驛館碑峩峩龍蛇飛舞烟雲拖顏筋柳骨字畫
勁臨風弔古重摩挲歷年雖久尙完好翰墨照耀辭
包羅有唐天寶始兆亂安史肆逆紛干戈河北擾攘
常山陷杲卿忠義雲天摩恒定數州降將獻成德建
鎮開山河盧龍魏博相犄角賜名賜姓皇恩多擁兵
跋扈拒朝命洪流扼險襟滹沱盛夏霖雨百川灌危
城浸沒汹風波垣墉重建基址擴凌雲樓櫓緣坡陀
隄防修築安瀾慶禦災捍患民情和幕中有才兼文
武銘鐘勒鼎豐功歌大書深刻高二丈問奇載酒輶
軒過雨淋日炙時勢改不隨荆棘理銅駝銀鈎鐵畫

正定縣志

卷四

古迹

二十五

字奇偉護持疑有風雷呵驥尾竊附名益顯崢嶸墨
寶光巖阿杲卿斷舌忠義奮賢愚比較難同科當時
無人紀其事穹碑未見詞云何 昭代褒忠恩禮重
崇祠薈蔚森庭柯淋漓有誰濡大筆貞珉勒字懸崕
磨

潭園歌

梁清標

鎮陽昔稱成德軍裹瘡百戰徒紛紛我聞潭園自五
代池館壯麗凌青雲數百年來閱今古江河滾滾揚
塵土當日王鎔貴盛時曲沼帷房貯歌舞赫赫名城
冠四方河朔旌據疇能當年少擁旄歷數世茲園快

樂春宵長匡威既滅趙王死年年花落空潭裏賦詩
再見歐陽公可惜風光同逝水我爲潭上人不見潭
上花日暮悲風起城闕喧啼鴉繁華消歇霸圖盡亭
臺何處空咨嗟徒咨嗟行且歌古來富貴幾人在朱
樓金屋餘青莎人世百年苦易盡蜂屯蟻鬪何其多
登高望故墟雪涕一回首荒塚自纍纍頗牧今奚有
平原客散邯鄲空主父宮中麋鹿走吁嗟北潭昔爲
鼃鼃窟今已沒蓬蒿滹沱白浪蹴天高南眺忽失趙
州橋賣漿博徒眞吾友欲往尋之阻洪濤君不見信
陵救趙日獨從毛薛游片言解紛掉臂去談笑座中

正定縣志

卷四

古迹

二十六

無王侯

北潭

卽潭園

梁清遠

畫廊紫閣自巍峩碧水潏潏雲樹多數百年來成寂
寞一泓寒碧漾清波

海子園

卽潭園

沈濤

宮潭繞郭渺層波不見荷花萬柄多此日荒榛竄狐
兔當年巨浪踏鼃鼃放歌易墮銅仙淚躍馬曾揮壯
士戈欲問墨崑崙舊宅滿廊黃葉病僧過

墨君和宅
卽今之臨

濟寺見學
庵筆記

海子園懷古

趙文濂

風日清和游泮渙選勝尋芳海子岸

地名在東門外少北

源泉

潑繞岸之隅秧稻青青田可灌新波初漲水鳥鳴古
迹重尋野老喚野老水畔爲我言盛衰無常慨然嘆
海子園卽古潭園桂殿蘭宮美哉奐花木叢雜繞瓊
林樓閣崢嶸圖錦幔飛雲捲雨朱戶開買笑徵歌紅
板按王鎔於此館匡威厚具供張忽蒙難雖然養虎
患自貽匡威伏辜旋解散太祖太宗赴鎮州伐漢伐
遼靖兵亂帷宮帳殿氣象雄畫棟珠簾光彩煥六龍
駐蹕奉宸游依水名園此其冠宋改爲行宮無端金有海
陵王內亂荒淫氣驕悍卜宅初造鳳凰樓遷都旋營

正定縣志

卷四

古迹

二十七

鳩鵲冠搜巖采幹到斯園大木千章根株斷

金海陵王伐潭

園樹本以營宮室

從此風景日蕭條修築無人峙楨幹垣頽

礎斷棟宇傾世易時移星霜換迄今又歷數百年古
迹難尋水之畔我聞此言穆然思治亂興亡細推勘
千古河山一局棋爭地爭城機謀算故宮禾黍詠風
詩斯園何能仍舊貫故址久已委荒烟滿志躊躇極
目看城郭樓櫓峙嵯峨泉水溝渠流浩瀚斷岸千尺
接城河步履尋幽勞不憚地名恰合舊園名核實循
名思過半文獻無徵忽有徵千載傳疑決一旦考古
如遇有心人不以余言爲河漢

王郡丞邀飲陽和樓

明
袁宏道

青天一碧翠遮空浪捲雲奔夕照中郭外荷花二十
里清香散作滿城風

十丈朱旗照水殷家家簫鼓樂江山千峰如畫供杯
酒不道清時是等閒

夏月邀友人飲陽和樓用壁間韻陳堯典

危樓百尺果如何載酒邀賓試一過四塔倚天扶畫
閣八樓匝地拱陽和靈鍾嶽北河山壯秀毓恒陽將
相多愧我宦遊臨此地也同羣彥望清波

登陽和樓

顧顯仁

正定縣志

卷四

古迹

二十八

高樓轉上奈春何幾度年華此一過三輔河山凌朔
漠千村桑柳動清和窗前雉堞連雲出塞上胡笳
晚多憑檻漫吟王粲賦大江回首渺烟波

夏日登陽和樓

國朝
梁清標

飛閣高蟠大麓開雄風蕭颯並蘭臺振衣自許陳登
氣避暑重傾袁紹杯落照蒼茫寒雨散太行縹緲白
雲來凌虛此日堪乘興月湧滹沱首屢回

冬日陽和樓落成王令君招飲 梁清遠

高閣凌風啟曙光重新奕奕擁金湯遙瞻恒嶽青霞
繞靜對滹沱白練長壺水漏沈清噩夢軒楹雪映動

華觴不緣賢令經營力豈得霜天日載陽

重陽日同謝芝雲陪陳露坪先生陽和樓登高

趙文濂

杖履追陪伴侶携層樓更上步丹梯嵐光繞郭羣山
小樹色連雲萬木低風白清和誰帽落關河雄壯共
糕題問天還待驚人句潑墨淋漓大筆提

步樂亭懷古

在縣治北元承
相史天澤建

史策先

鎮陽烟樹鬱青青聞說吾家舊有亭頽址已隨陵谷
變野花猶傍墓田馨千年運會開夷夏一代才名貫
斗星至竟村民成樂土歡聲長向耳邊聽

正定縣志

卷四

古迹

二十九

滋溪書堂

元謝端

趙之川滹浸涑易恒漉洩泝各異出惟滋有溪亦是
匹或伏或見乃不容不能百里滹是從混混千里俱
朝宗予曩涉河觀湖江踔雲蕩日怒擊撞歸視於滋
嶺之瀧是滋名揚子所始有田有廬水之涘有堂三
楹庠非侈六經子史堂右左高曾遺子以自課子迺
善繼志不惰蒐今摭古抉怪奇泓涵演迤吐爲辭副
墨往往傳京師羸金青紫世所取滋溪有源子有後
斯堂斯書可世守

滋溪書堂爲蘇伯修

虞集

滋源恒伏流春雨川乃盈林疇廣敷潤草木俱繁榮
臨深見游滌仰喬有鳴鶯君子樂在斯齋居托今名
積學抱深默時至有攸行抽簡魯史存采詩商周并
禹穴追馬公湘江弔屈生紉蘭不盈握伐木有餘情
浩然欲淨海歸與還濯清方舟我爲楫白髮愧垂纓

春風亭歌

甲 滋溪先生也

梁清標

東垣城北春風亭別墅創自滋溪公蘇公風流擅當
代名與恒嶽爭穹窿我聞茲亭結構始闢園植木安
豐里桃杏千株樹樹花翼然亭立臨滋水春風淡蕩
滋水流花開花落聞鳴鳩歲久積土高成邱先生旣

正定縣志

卷四

古迹

三十一

去亭空留舊有讀書堂復築舒嘯臺于今廢址生蒿
萊堂中圖史安在哉憑高四望徒徘徊爲問安豐人
不識舊亭處臺榭已茫茫春風自如故荒原寂寞迷
烟霧行人祇見安豐樹先生本是濟世人先憂後樂
擬退身黃農虞夏在懷抱有志未竟何艱辛嗚呼人
壽幾何兮時難再得滋溪終古流不息日落風吹大
陸塵先生不見淚沾臆

舒嘯臺懷古

史策先

滋水東流繞廢臺滋溪曾此草堂開地當燕趙悲歌
處人是皋夔濟世才夜月幾聞鸞鳳嘯春風空有燕

鶯來安豐舊里花干樹一例蒼涼畫角哀

趙文濂

滿志躊躇歸去來東臯舒嘯興悠哉長吟短詠偕鸞
鳳斷址頽垣沒草萊淖水有聲新漲吼石碑無語野
花開荒臺日暮悲風起嗚咽惟聞畫角哀

雕橋莊

明汪元范

大茂羣山側東開晉國莊門題冠蓋里地敞稼禾場
美蔭依喬木清風見古堂非因事遊衍素業在耕桑
百畝周渠畔油然秀稻苗不煩棹沃水翻借鳥名橋
待餉宜將饁求豐願力薦上卿憂國意疇昔此中銷

正定縣志

卷四

古迹

三十一

樓開蓮渚上臺出柳陰中重潤占春雨輕香趁夏風
賜金常日散遊履幾人同野老知遺事時時說宰公
不購平泉石惟藏鄴架書賔來松釀熟人去竹窗虛
鳥雀棲深樾莓苔上廣除至今蘭與玉森立是留餘

馮銓

何處名園好雕橋景物多竹深人失徑花密鳥成歌
槐老尚書里蓮芳令尹河擬乘王子興一棹夜相過

梅之煥

曳履班頭早乞身高風北斗並嶙峋卽看喬木槐陰
舊又見孫枝奕葉新徐勉不妨風月趣山公原是竹

林人不須更勒平泉石領取鶯花歲歲春

李標

別業古城西悠然此得棲地偏谷口靜路入輞川迷
堂構看新築茅茨有舊題羊求應數過三徑可攀躋
城市真喧雜村居快野情水花香自遠山鳥韻偏清
老樹連村合新杭按畝平看雲興不淺隨意聽瓶笙
大木千章合長隄一水通花臺嬌浥露柳桁軟經風
沙渚羣鷗浴溪橋萬竹藂出門閒步履時有釣魚翁
彌望蒼茫裏林中止此村樓臺依靜渚蔬果繞名園
賸有書連屋止將鶴應門野人元慣習農事好同論

正定縣志

卷四

古迹

三十二

望裏塵囂遠神游太古初居真同畏壘夢亦是華胥
世變紛無定時艱劇未舒治安行就草蚤擬上公車

錢兆登

莫驕金谷貴風雅重梁園關水通沙氣開軒納曉嵐
花香春撲滿樹影午清圓不作槐安夢開軒草太元

祁伯裕

恒山北望鬱蒼蒼太宰園林萬卉芳喬木時沾新雨
露高門無改舊風光西韓水衍千秋澤北海人浮百
歲觴最愛堂前雙紫燕翩翩常附鳳毛翔

苦憶梁園勝逶迤傍水濱築場臨大陸畦稻繞通津

山色常沾座波光不染塵興來隨杖履徙倚坐花茵

劉榮嗣

爽氣朝來映水濱天開勝地老元臣敢忘丹陛非常
眷彌繫蒼生隱後身古道猶存花竹靜時賢共樂水
山新不因多事如今日始憶當年綠野人

蘇繼歐

深郊橡栗杜陵居可是先朝問稼餘淖水有波皆作
帶武陵無棹不通漁芰荷學剪山人服 猶鑄太
史書却訝諸郎好籌國一屯棋局界

周河一派雨中村第幾橋頭泛夕樽雷煥早知騰紫

正定縣志

卷四

古迹

三十三

氣邵平未許負青門從來才子詩爲骨但 玉作
魂雲水畿南稱最勝不妨客去止留髡

沙汀錦縠絢波紋蓮渚疇烟淡淡分地主唱酬皆爛
熳生徒襟袖盡氤氳清平宦况叨恒岳伯仲詩情空
冀羣欲笑薜蘿情未固少年生事動青雲

雕橋忽憶出城西雲水蕭疎萬木低地自神臯餐沆
瀣官仍太宰隱鳧鷺舒徐歲月惟槐影耕鑿生涯止
稻畦往事十年曾按部滿堂風雅句留題

失名

五柳深藏徑三槐舊勒銘井因投轄鑿舟爲看花停

負郭田俱秫邀賔玉作瓶秋 耿南極長伴少微星
投簪餘白髮結屋傍青山歲月琴罇裏生涯烟水間
點渠荷葉水縈石蘇苔斑杖履行吟處清風扣竹關
五柳開幽徑全疑陶令家問花春不減對月酒頻賒
入饌餘新笋鋤畦帶曉霞明農各努力莫惜鬢生華

雕橋莊歌

國朝

吳偉業

高邑趙忠毅公雕橋莊記曰吾郡梁太宰有雕橋莊
在郡西十五里大茂諸山之東前臨滹沱西韓二水
東爲大門表之曰尚書里有樓曰蓮渚仙居有堂曰
壽槐槐可四十圍相傳數百年物太宰功成身退尙

正定縣志

卷四

古迹

三十四

祥於此者二十年今其孫慎可讀書其中自號爲西
韓生云此忠毅家居之所作也公後拜吏部尚書視
梁公以同郡爲後繼竟因黨禍戍代州死慎可以孝
廉入中翰余始識之知其爲趙公友尋以齟齬去相
別十餘年今起官水部家門蟬冕當代莫與比焉余
以其名山別墅亂後獨全高門遺老晚節最勝雕橋
盛事自太宰以來百餘年於此矣是可歌也爲作雕
橋莊歌

常山古槐千尺起雕橋西畔尚書里偃蓋青披大茂
雲扶疎響拂韓河水水部山莊遶碧渠彈琴長嘯修

篁裏今年相見在長安據鞍卻笑吾老矣盡道新枝
任棟梁不知老幹經風雨目言少年西韓生幽并豪
俠皆知名酒酣箕踞聽鼓瑟射麋擊兔邯鄲城天生
竒質難自棄一朝折節傾公卿當時海內推高邑趙
公簡重稱相得才地能交大父行襟期雅負名賢識
公曾過我讀書處笑倚南樓指庭樹歸田太宰昔同
游廿載林泉共來去此是君王優老臣後來吾輩應
難遇每思此語輒泫然知己投荒絕塞天同是冢臣
恩數異傷心非復定陵年黃巾從此成貽禍青史誰
來間斷編鈎黨幾家傳舊業干戈何地著平泉我有

正定縣志

卷四

古迹

三十五

山莊幸如故老樹吟風自朝暮磐石甯容螻蟻穿斧
斤不受樵蘇誤鈴索高吟擁賜書名花異果雕欄護
綠葍紅蕖水面開門前卽是鳴騶路子弟傳呼千騎
歸不教鞍馬驚鷗鷺年年細柳與新蒲粧點溪山入
畫圖四海烽烟喬木在一窗燈火故人無相逢止有
江南客頭白樽前伴老夫

雕橋莊

女史

沈 蘂

荒莊猶說定陵年細柳新蒲入畫傳己見亭臺付荆
棘曾聞花石勝平泉夕陽剩照槐千尺舊事空餘水
一天更有蕉林老書屋蒼涼喬木總寒烟

不蕪園

趙南星

在諸福屯東北隅今雖荒廢基址尙存梁太宰舊園也

籬落俱成趣東皋每會心遠花呈秀色幽鳥奏奇音
取樂多方具移罇是處斟主人情不極勢力尙難禁

壽槐堂憶昔

采清遠

少保拂衣請歸老閒園高卧掩荆扉門前韓水春浩
蕩鴛鴦鷺瀟瀟遶池飛北岸人家築高屋華滋玉樹大
十圍土人記是前朝物扶疎枝業綠烟霏少保作室
臨寶樹畫棟珠簾人跡稀疊青踏翠瓊枝裊時有玉

正定縣志

卷四

古迹

三二十六

露濕雲衣奕世讀書好曠達閒來吟眺玩芳菲三十
餘年逾條茂蕭蕭叢色沾春暉近來少保老孫子棄
官學道甘息機人言靜退高天下自笑生平畏是非
樓居終日不履地坐挹空翠香馥馥莓苔溜雨屋欹
傾扶筇感嘆人歔歔但令樹存良亦足甯論千年願
無違六一居士曾吟賞鎮陽殘杏尙依稀三朝事往
五百載誰人懷古能知幾瑟居夜夜無愁夢斷垣頽
壁有餘輝高齋清晝養恬素花落花開自樂饑 荒
園葡萄新吐蔓南畝黃精葉正肥老我一邱謝時輩
終日抱琴意自微蔽風蔽雨得所託况復潭西有釣

磯

東垣城懷古

容不華

偶過東垣感慨增離離禾黍滿溝塍

廢城中渠水橫
流盡種禾黍

水流哽咽君知否欲向行人說廢興